

AKASHVANI AIZAWL

REGIONAL NEWS BULLETIN

Friday, May 23, 2025 Time - 2:30pm - 2:35pm

RISING NE INVESTOR'S SUMMIT

Prime Minister Narendra Modi chuan ram hmasawnna tur atan hmarchhak bial tih hmasawn chu hna pawimawh hmasa a ni a ti.

He thu hi vawiina New Delhi khawpuia Rising North East Investor Summit a hawnna ah sawiin Prime Minister chuan hmarchhak bial hrang hranga hmasawnna tur hmachhawp a awm a ti a, theihna tam tak an nei tih sawiin a ram leilung awmdan a danglam avangin thil tha bik tam tak a awm tih sawiin khualzinte hipna tur hmun tam tak a awm thu a sawi bawk.

Prime Minister chuan a sawrkar kaihhruai chuan rawlrala chetna na takin an do thin a ti a, hel nuaibo kawngah nasa takin hna an thawk tih sawiin ramchhung kilkhawr thlengin hma an la zel dawn a ti a, hemi kawngah ram mipuite thlawpna an mamawh tih a sawi bawk.

Vawiina hun hmanah hian DoNER Minister Jyotiraditya Scindia pawhin thusawiin hmarchhak bial hmasawnna turin sawrkar laipuiin theihtawp a chhuah a ti a, inkalpawhna kawng tih chak niin South East Asia nen insumdawn tawnna tha zawk a awm theihna atan hmarchhak bial chu kawng pawimawh tak a ni a ti a, hmasawnna tur tam tak a neih avangin state tin te hemi kawngah tan la thar turin a chah bawk.

Rising North East Investor Summit hi ni 2 chhunga neih tura ruahman a ni a, hemi chhung hian hmasawnna tur hrang hrang hmachhawp chu state tin ten an sawiho dawn a, Mizoram atangin Chief Minister Pu Lalduhoma leh sawrkar mi pawimawh te he hunah hian an tel ve a ni.



IRCTC

Indian Railway Catering & Tourism Corporation (IRCTC) hotute chuan Mizorama tourism ti hmasawn turin Mizoram sorkar nen an thawkho dawn tih an sawi.

Vawiina Aizawl Press Club-a chanchinbumite an kawmnaah he thu hi sawiin IRCTC hotute chuan Mizoram sorkara Tourism Department Director nen thawhdunna MoU ziah an tum thu leh, kar thar lo awm turah chuan tihfel an tum thu an sawi a. Inremna hi ziah a nih chuan hmarchhaka khual zin tam zawk an lo luh zel theihna tura mellung pawimawh tak a nih dawn thu an sawi a. Mizorama rel a lo luh huna rela ei leh in leh khualzin chinfel te, ticket buaipui te anmahni kut a nih dawn thu an sawi bawk a ni.

*Byte of Lalsawmliana Hmar IRCTC Tourist Officer*

IRCTC hotute chuan Mizorama khualzin hruai luh mai bakah mipuite tana remchang tak tur zin theihna programme tha tak tak an neih thu an sawi a. Man man takin ram hrang hrang tlawh theihna tur tour package hrang hrang an neih thu an sawi a. Hei bakah hian Kristian sakhua vuantute tana hmun pawimawh hrang hrang Korinth, Thessalonika, Athens, Rome leh adangte tlawha an zin pui thin thu an sawi bawk a ni.

IRCTC hi Ministry of Railways hnuaia Indian Railways peng pakhat niin rail chhung leh station-a ei leh in buaipui bakah ramchhung leh ram pawna khualzin buaipui hna te an thawk a ni.



CYMA

Kumin January ni 1 atanga tun thla ni 16 thleng khan Central YMA Kumpuan Sub-Committee leh Central Anti-Drugs Squad (CADS) te chuan ruihhlo cheng nuai 317 chuang man an man tawh.

Central YMA hotute atanga thudawn danin hemi chhunga ruihhlo chi hrang hrang man hi cheng nuai 317 sing 4 sang 7 500 man hu a ni a. Ruihhlo kaihnawihah hian mi 797 an man tawh a, heng mihring an man zinga 68 chu Excise & Narcotics-ah an pe a, Home leh Centre-ah mi 70 an dah lut a, police department-ah mi 5 an pe a. Mi 265 counselling an pe tawh bawk a ni.

Central YMA hnuaia ruihhlo man zingah hian heroin (No. 4) hawng 649, cheng nuai 194 leh sing 7 man hu leh heroin (no. 4) vek, tictac bur 1401 cheng nuai 25 sing 2 sang 1 zariat man hu a tel a. Heng bakah hian AP, Trama leh adangte mum sing 2 sang 6 chuang, Ganja kg 72, Codein bur 2232, sap zu bur 69, local zu bur 364 leh beer can 54 a tel a ni.



JEFFREY HMINGCHULLO

Jeffrey Hmingchullo (kum 45) s/0 Lalkhawthlang, Rengkai, Churachandpur chuan nimin khan Rashtrapati Bhavan ah President Droupadi Murmu hnen atangin sipai huaisen chawimawina Shaurya Chakra a dawng.

Jeffrey Hmingchullo hi CRPF ah Inspector a ni a, kum 2023 khan Jharkhand ah hel pawl Maoist te nen an inkahna ah huaisen tak leh rem hre taka che in hel pawl pahnih a kap hlum a, a thiante pawh an him theih phah a, hei vang hian sipai huaisen chawimawina hi hlan niin amah rual hian Shaurya Chakra hi mi 33 hnenah hlan an ni.

Chief Minister Pu Lalduhoma chuan social media kaltlangin India sawrkarin mi huaisen bik te hnena chawimawina a pek thin, peace time Gallantry Award sang pathumna, Shaurya Chakra dawngtu Inspector Jeffrey Hmingchullo, CRPF, chu a lawmpui leh a chhuan thu a sawi a, A thil tih chuan Zohnahthlakte a chawimawi a, midangte tana entawn tur thil tha a hnutchhiah tih sawiin mahni inphata ram hmangaih turin mitin a ko tih a sawi.



PM MANN KI BAAT

Prime Minister Narendra Modi chuan Pathianni chawhma dar 11 hian 'Mann Ki Baat' programme-ah ram chhung leh ram pawn mipuite hnenah thu a sawi leh dawn a, Tun tum ami hi a tum 122-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni bawk ang.

